

Suliffeqarnermut tunngatillugu apeqqutigineqarajuttut

Apeqqutit akissutillu suliffeqarnermut attuumassuteqartut SIK-mut ilaasortanut sammisitat

Soorlumi akissutinit ersertoq, tulluartsuusaq nalornisooraanni sulisut sinniisaannut, sumiiffimmi peqatigiiffimmut imaluunniit SIK-p allattoqarfianut Nuummiittumut saaffiginnissalluni, apeqqutaalluni apeqqut suna pineqarnersoq.

Apeqqut 1:

Atorfinitsitaanermut isumaqatigiissutima misissornissaanut ikiorneqarsinnaavunga?

Aap, SIK-mut ilaasortaaguit atorfinitsitaanermut isumaqatigiissutivit misissorneqarnissaanut tamatigut ikiorneqarsinnaavutit sulisut sinniisaannit, sumiiffimmi peqatigiiffimmit imaluunniit SIK-p allattoqarfianit.

- Nalornisaqaruit atorfinitsitaanermut isumaqatigiissut atsioqinagu. Apeqqutiginiakkatit akissutissarseqqaakkit.
- Atorfinitsitaanermut isumaqatigiissummi minnerpaamik uku allassimasariaqarput:
 - Sulisitsisup sulisullu aqqi adressiilu.
 - Atorfiup taaguutaa.
 - Isumaqatigiissut suna atorfeqarnermut atuunnersoq.
 - Akissarsiat piffissarlu suliffiusoq.
 - Ulloq atorfiniffik.
 - Soraarnermi/soraarsitsinermi piffissaq sioqqutsisumik kalerriiffiususaaq.

Apeqqut 2:

Sulisitsisora atorfinitsitaanermut isumaqatigiissummik allagaqarusunngilaq. Qanoq iliussaanga?

Atorfinitsitaanermut allagartaliisarneq pillugu inatsisissaq Inatsisartut 2022-mi ukiakkut ataatsimi-innerminni akuersissutigivaat. Taamaalilluni sulisitsisoq atorfinitsitsinermi isumaqatigiissusiortar-nissamut pisussaaffilerneqassaaq. Inatsisissarli aatsaat atuutilissaaq Naalakkersuisut nalunaarusi-ornermikkut inatsisip qaqugu atuutilernissaanik aalajangersaareerpata.

Inatsisip tamatuma atuutilernissaata tungaanut ima siunnersorusuppatsigit:

- Ilinnut pitsaanerpaassaaq atorfinitsitaanermut isumaqatigiissuteqaruit. Taamaattumik tamanna sulisitsisumut qinnutigisariaqarpat.
- Sulisitsisoq atorfinitsitaanermut isumaqatigiissusiorumangippat allatut qulakkeerniartari-aqarpat qanoq akissarsiaqartitaaniarnersutit sulininnilu allatigut qanoq atugassaqartitaani-arnersutit – pitsaanerpaassarlu allakkatigut tamakku uppersarneqarpata.
- Sulisitsisoq atorfinitsitaanermut isumaqatigiissusiorumassanngikkaluarpat sulisut sinniisaat, peqatigiiffik imaluunniit SIK-p allattoqarfia attavigisinnaavatit siunnersorneqaqqullu-tit.
- Atorfinitsitaanermut isumaqatigiissusiortoqarpat taanna atsiortinnagu SIK-mut ilaasortatut periarfissaqarputit SIK-p allattoqarfiani siunnersortit ilaannut isumaqatigiissut misissortis-sallugu.

Apeqqu 3:

Misiliummik atorfinitsinneqarpunga. Tamanna uannut qanoq isumaqarpa?

Sulisitsisoq aalajangersinnaavoq misiliummik atorfinitsinniarlutit, tamanna atuutissalluni sivilisun-erpaamik qaammatini pingasuni. Misiliummik atorfeqarallarnissap isumaqatigiissutaanera allassima-suutigineqassaaq (tamanna atorfinitsitsinermut isumaqatigiissummiikkajuppoq).

- Misilinneqarnerup nalaani sulisitsisup sivikillisamik piffissaliilluni sioqqutsisumik kalerriinik-kut soraarsissinnaavaatit, taamatuttaaq illit sulisutut sivikillisamik piffissaliillutit sioqqutsi-sumik kalerriinikkut soraarsinnaavutit.
- Misilinneqarnerup nalaani soraarsitsinermi/soraarniuteqarnermi tunngavilersuilluarnis-samik piumasaqaatit misilinneqarnerup qaangiutereernerani piumasaqaatit inngillat. Imaluunniit ima oqaatigalugu: Misilinneqarnerup nalaani sulisitsisumut oqinnerussaaq so-raarsissallutit, ilinnullu oqinnerussalluni soraarniassallutit, misilinneqarnerup kingorna atorfinivinnermi piumasaqaataalersussanut naleqqiullugu.
- Misilinneqarneq qaangiuppat “nalinginnaasumik” atorfeqalissaatit, taamalu soraarsitsiner-mi soraarniarnermiluunniit sioqqutsisumik kalerriinissamut piffissat nalinginnaasut atuuti-lissallutik.

Apeqqu 4:

Sulisut sinniisaata qanoq ikiorsinnaavaanga?

Sulisut sinniisaat suliffimmi suleqatigisaminut qinerneqartarpoq, suliassaralugu soqutigisassi aqutsi-sut tungaannut sulissutigisarnissaat.

- Sulisut sinniisaat arlalitsigut ilinnut iluaqutissanik isumagisassaqqarpoq, soorlu:
 - a) Pisuni aalajangersimasuni siunnersuisarnermigut, soorlu sulisitsisup soraarsinnialersaalerpatit.
 - b) Akissarsianut tapinik isumaqatigiinniarnermi ikiuunnermigut.
 - c) Illersuisutut ikiuunnermigut, soorlu napparsimalluni sulinngittarnerit pillugit oqaloqatigiinnerni, atorfirmut tunngatillugu oqaloqatigiinnerni il.il.
 - d) Iluarsisariiallit aqutsisunik oqaloqatiginnissutiginerisigut, soorlu makkununga tunngasut: Piffissap suliffiusup inissisimanagera, unillatsiarnerit neriffiusut qasuserfiusullu kii-salu sullivimmi avatangiisit.

Apeqqu 5:

Suliffinni sulisut sinniisoqangillat. Qanoq iliussaanga?

Sulisut sinniisaannik qinersisoqassappat piumasaqaataavoq sulisut SIK-p isumaqatigiissutaa malillugu atorfeqartinneqartut ikinnerpaamik tallimaanissaat.

- Taamaattumik tallimaagussi – sulisullu sinniisoqangippata – suleqatitit oqaloqatigisinnavatit sulisut sinniisaannik qinersinissaq pillugu.
- Peqatigiiffik ikiuullunilu siunnersuisinnaassaaq qanoq sulisut sinniisaannik qinersinissarsi pillugu.

Apeqqu 6:

Sulisitsisup sulinermik aqutsisinnaatitaanera. Tamanna qanoq isumaqarpa?

Namminersorlutik Oqartussanik suliffiutillillu namminersortut kattuffiannik Grønlands Erhvervimik (GE) SIK-p tunngaviumik isumaqatigiissutaa allassimavoq sulisitsisoq suliarnik aqutsisinnaatitaallunilu agguataarisinnaatitaasoq. Aqutsisinnaatitaaneq tamanna soorunami killissaqqarpoq. Soorlu inatsisit isumaqatigiissutillu sulisitsisup sulinermik aqutsisinnaatitaanerata killinginik aalajangersagaqqarput.

- Aqutsisinnaatitaanermi ilaatigut pineqqarput a) kissaatigisarpianik sulisussarsisinnaatitaaneq, b) suliassamut malitassisinnaatitaaneq/naalakkiuteqarsinnaatitaaneq, kiisalu c) soraarsitsisinnaatitaaneq, tamanna sulisup imaluunniit sulisitsisup atugarisaanut tunngatillugu naleqquttumik tunngavissaqqarpat.
- Soraarsitsinissamut pisinnaatitaaneq taaneqareersutut killissaqqarpoq. Taamaalilluni soraarsitsisoqarsinnaavoq aatsaat tamanna sulisup imaluunniit sulisitsisup atugarisaanut tunngatillugu naleqquttumik tunngavissaqqarpat (imaluunniit isumaqatigiissutini allassimasutut: inunnik ataasiakkaanik soraarsitsinerni assigiinngitsuliortoqassanngilaq). Soraarsitsinerit sulisup imaluunniit sulisitsisup atugarisaanut tunngatillugu naleqquttunik tunngavissaqqarsinnaapput: Soorlu sipaarniarnernik, suliassaaleqinermik, suleqatigiinnermi ajornartorsiuteqarnermik, piukkunnanginnermik imaluunniit suliartunngitsoortarnermik.

Apeqqu 7:

Funktionærit (“atorfillit”) pillugit inatsimmi kikkut ilaatinneqarpat, tamannalu sunik pisinnaati-taaffiliiva?

Sulisartut SIK-p isumaqatigiissutaanik atuisut ilaannaat funktionæriupput, atorfillit pillugit inatsimmi pineqartut eqqarsaatigissagaanni.

- SIK-p isumaqatigiissutaanik atuisut funktionæriusut ilaatigut tassaapput allaffimmiut aamma meeraaqqerivinni meeqqerivinnilu sulisut. Sulisut lederitut pisortasut aamma funktionæriusinnaapput.
- Funktionæritut atorfeqarneq soraarsitaalernermi pisinnaatitaaffiliisarpoq. Soorlu sulisitsisoq soraarsitsinialeraangat sioqqutsisumik kalerriinermut piffissaq sivisunerusarpoq.
- Nalorniguit funktionæriunerlutit SIK-mut ilaasortatut SIK-p allattoqarfia saaffigisinnaavat. Funktionæriunersutit taamaannginnersutilluunniit tassani nassuiaanneqarsinnaassaait.

Apeqqu 8:

Sulisimanermik uppernarsaammik, qanoq sivisutigisumik sunillu suliaqarsimaninnik uppernarsaataasumik, pisassaqtitaavunga?

Funktionæriuguit (soorlu allaffimmiuullutit meeqqerivimmiluunniit sulisuullutit) sulisimanermik uppernarsaammik sulisitsisunnit pisassaqtitaavutit, tassani allassimassalluni piffissami sumi sulisimanersutit, sunik suliaqarsimanersutit kiisalu qanoq akissarsiaqtitaasimanersutit.

- Funktionæriunngikkuit sulisimanermik uppernarsaammik pisassaqtitaanngilatit, tamanna atorfinitsinneqarnermut isumaqatigiisummi imaluunniit sulisut akissarsiaat sulinermilu atugassarititaasut pillugit kattuffiup isumaqatigiissutaani allassimangippat. Pisassaqtitaanngikkaluarlutilli soorunami sulisitsisoq sulisimanermik allagartamik taamaattumik qinnuigisinnaavat. Taava akuerisinnaavaatit itigartillutilluunniit.
- Sulisitsisut pisussaaffeqanngilaq ilassinneqqusissummik allakkiuutissallutit, kisianni taamaattumik allagaqaqqullugu qinnuigisinnaavat – taava sulisitsisup nammineq aalajangissavaa tamanna akuerissanerlugu.

Apeqqu 9:

Qanoq sivisutigisumik feeriarsinnaatitaavunga? Sulisitsisuma feeriarnera unitsissinnaavaa? Feeriarnema nalaani napparsimaleruma sunik pisinnaatitaaffeqassaanga?

Feeriarneq pillugu inatsit naapertorlugu ukiut tamaasa sapaatip-akunnerini tallimani feeriarnisamik pisassaqrputit, ukiumi feeriarfimi 1. februaarimit 31. januaarimut ingerlasumi.

- Qaqugu feeriassanersutit illit sulisitsisuillu nalinginnaasumik isumaqatigiissutigisussaavarsi. Isumaqatigiissinnaanngikkussili sulisitsisup aalajangersinnaavaa qaqugu pissanersoq. Taamaattoqartillugu sulisitsisup feeriarneq pillugu inatsimmi aalajangersakkat malittussaavai, soorlu sivikinnerpaamik sapaatip-akunnerini pingasuni ataqatigiimmik feeriarinnaatitaaneq. Aamma feeriap qaqugu pinissaata sioqqutsisumik nalunaarutigineqartarnissaanut malittarisassaqarpoq, taamaalillutit feeriarnissat piareersimaffigisinnaaniassagakku.
- Erseqqisumik tunngaviusoq tassaavoq feeriarnert aallartereersoq sulisitsisup unitsissinnaanngikkaa suliartoqqullutillu. Kisianni sulisitsisup – pissutissaqarluaruni – suliartoqqusinnaavaatit feeriap aallartinngitsiarnerni. Taama pisoqassagaluarpat taartisiatut feeriaqarsinnaatitaavutit, feeriarnissaraluavillu unitsinneqarnerani annaasaqaatinngortut sulisitsisup matussusissavai.
- Feeriarneq pillugu inatsimmi aamma malittarisassaqarpoq feeriap nalaani napparsimalernermut tunngasunik. Napparsimaneq sivikinnerpaamik nalunaaquttap-akunnerinik 40-nik siviussuseqarsimappat, taamalu feeria siunertaasutut ilorrisimaarfiutigiunnaarluni, taartisiatut feeriaqarsinnaatitaavutit.
- Feeriamut tunngatillugu pinsinnaatitaaffitit nalornissutigukkit SIK-mut ilaasortatut SIK-p allattoqarfia paasiniaavigisinnaavat.

Apeqqu 10:

Akissarsianut tapisiat pillugit isumaqatigiinniarnissamut ikiorneqarsinnaavunga?

Aap. Isumaqatigiissutit assigiinngitsut akissarsianut tapinik qinnuteqarnissamut pinsinnaatitaaffiliipput. Illit suliannut tunngatillugu tapit suut periarfissaanersut isumaqatigiissummi illit sulinnut atuuttumi takusinnaavatit. Tapit isumaqatigiinniutigineqarsinnaapput sulisut sinniisaannit, peqatigiiffimmit imaluunniit SIK-p allattoqarfianit.

- Sulisut sinniisaat, peqatigiiffik imaluunniit SIK-p allattoqarfia saaffigikkit.

Apeqqu 11:

Napparsimallunga sulinngippallaarnera pissutigalugu sulisitsisup soraarsissinnaavaanga?

Napparsimaneq immi soraarsitaassutigineqarsinnaanngilaq, napparsimaneq pissuteqavilluni sulinnginnertut isigineqartarmat. Imaanngilarli napparsimallutit sulinngippallaaruit soraarsitaasinnaanngivissutit. Sulisitsisup pissutissaqarluaruni napparsimaneq pissutigalugu soraarsissinnaavaatit. Pissutissaalluortoq tassaasinnaavoq suliassat naammaginnartumik naammassineqarsinnaajunnaarnerat, ullorpassuarni napparsimagavit. Napparsimallutit sulinnginnerit sulisitsisunnit soraarsitissutissatut pissutigineqassaguni qanoq annertutigissanersoq imaaliinnarlugu oqaatigineqarsinnaanngilaq, pissutsit pineqartut ataasiakkaat qanoq ittuunerat apeqqutaagami.

- Ullorpassuit napparsimasimaguit sulisitsisup isumassuilluartuuniartup oqaloqatigerusussa-vaatit. Tassani ilaatigut oqaloqatigiissutigineqarsinnaavoq napparsimallutit sulinngittarnitit qanoq killilersimaarneqarsinnaanersut, suliassatit allatut aqqissuunneqarallarsinnaanersut imaluunniit sivikinnerusumik sulisarallarsinnaanersutit.

Apeqqu 12:

Ulluni 120-ni napparsimanermut malittarisassaq sunaava – uannullu qanoq sunniuteqassava?

Ulluni 120-ni napparsimanermut malittarisassamik taaneqartartoq tassaavoq ukiup ataatsip ingerlanerani ullut 120-t sinnerlugit napparsimasimagaanni qaammammik ataatsimik siumoortumik kalerrinneqarluni soraarsinneqarsinnaaneq – ukiut qassit sulisuusimanerit apeqquaatinnagu. Tassa malittarisassami pineqanngilaq ukiup ingerlanerani ulluni 120-ni napparsimaguit aatsaat sulisitsisup soraarsissinnaalissagaatit, pineqarporli ukiup kingulliup ingerlanerani ulluni 120-ni napparsimasimaguit piffissaq soraarsitsinissamut siumoortumik kalerriiffiususaaq sivikillineqassasoq.

- Sulisitsisoq ullunut 120-nut malittarisassamik atuisinnaatitaavoq aatsaat atorfinitsinneqarinnut isumaqatigiissummi allassimappat malittarisassaq taanna atorfeqarinnut atuuttoq.

Apeqqu 13:

Sulisitsisoq qanoq ilisukkut nakorsamit uppersarsaammik piunasaqarsinnaava?

Napparsimalluni sulinnginnermut uppersarsaataasussamik nakorsamit uppersarsaammik sulisitsisoq piunasaqarsinnaatitaavoq – ullualuit sulisimanngikkaanni.

- Nakorsamit uppersarsaammik pissarsinnermut aningaasartuutit sulisitsisup akilissavai.

Apeqqu 14:

Perulunnartumik nappaateqalerpunga. Suliffinnut tunngatillugu qanoq iliussaanga?

Isumaqatigiissutit tunngavigalugit assigiinngitsunik pisinnaatitaaffeqarputit perulunnartumik nappaateqaleruit.

- Piaartumik sulisitsisut nappaatit pillugu ilisimatiguk.
- Suna nappaatiginerlugu uppersarsaatip napparsimavimmit pissarsiarinissaa eqqaamajuk.
- Sulisut sinniisaat, peqatigiiffik imaluunniit SIK-p allattoqarfia attaveqarfigikkit siunnersortinniarlutit.

Apeqqu 15:

Ilaqtara qanigisara perulunnartumik nappaateqalerpoq imaluunniit toquvoq. Suliffinnut tunngatillugu uanga qanoq periarfissaqarpunga?

Isumaqatigiissutini assigiinngitsunik periarfissinneqarputit illit perulunnartumik nappaateqaleruit imaluunniit ilaquuttavit qanigisavit (tassani pineqarlutik angajoqqaat, aapparisaq, qitornat imaluunniit qatanngutit) arlaat perulunnartumik nappaateqalerpat toqulluniluunniit. Tamatumani soorlu akiliunneqarsinnaavutit qanigisat ornillugu angalanissannut, tamatumunngalu atatillugu akissarsiaqaannarlutit sulinngikkallarnissannut pisinnaatitaaffeqarlutit.

- Piaartumik sulisitsisut nappaat pillugu ilisimatiguk napparsimavimmillu uppersaammik pissarsigit.
- Sulisut sinnisaat, peqatigiiffik imaluunniit SIK-p allattoqarfia attaveqarfigikkit siunnersortinniarlutit.

Apeqquut 16:

Sulininni ajoquserpunga. Qanoq iliussaanga?

Sulininni ajoqusersimaguit pingaaruteqarpoq ajoquserneq ingerlaannartumik nalunaarutigissallugu, kingusinnerpaamik ukioq ataaseq qaangiutsinnagu.

- Nalunaaruteqarfigineqartussa qassaavoq Sulisilluni Ajoqusernerit Pillugit Sullissivik, Nuumiittoq. Tassani aalajangerneqassaaq ajoquserneq imaluunniit nappaat sulinermit ajoqusernertut akuerisaasinnaanersoq. Sulinermit ajoqusernertut akuerineqarpat makkuninnga periarfissaqarputit: Ajoqusernerup kingunerinut taarsiiffineqarnissaq, suliaritinnermut aningaasartuutit matussuserneqarnissaat aamma napparsimanerup nalaani ullormusiaqartineqarnissaq.
- Nalunaarutiginninneq nalinginnaasumik nakorsa q imaluunniit sulisitsisoq aqutigalugit pissarpoq, taakku sulinermit ajoqusernernerit pisoqarpat nalunaarutiginnissamut pisussaaffeqarmata. Ajonaluartumik ajoqusernernerit nalunaarutiginninngitsoortoqartarpoq. Taamaatumik tamanna eqqumaffigisassaavoq, ukiorlu ataaseq killissarititaasoq qaangiutsinnagu ajoqusernerit nammineq nalunaarutigisinnavat.
- Paasissutissat amerlanerusut www.cfa.gl -imi pissarsiarisinnavatit. Nalunaaruteqarnermut immersugassaaq nittartakkami tassaniippoq, immersugassarlu aamma toqqaannartumik ammarneqarsinnaavoq una toorlugu: www.anmeld.gl
- Malittarisassat aammattaaq atuupput illit inooqatigisat/katillugu aapparisaq imaluunniit qitornavit arnaat/angutaat sullivimmi ajutoorluni toquppat, illit qitornatilluunniit ataasiartumik tunniunneqartumik pissarsiaqarsinnaagavit/-gamik (ilisinermut ikiorsiissut aamma pilersuisumik annaasaqarnermi taarsiissut).
- SIK-mut ilaasortatut SIK-p allattoqarfianut saaffiginnissinnaavutit siunnersorneqarusullutit.

Apeqqu 17:

Naartuleruma imaluunniit erninnut atatillugu/angajoqqaatut sulingikkallarninni soraarsitaasinnaavunga?

Naartutillutit soraarsitaasinnaavutit. Kisianni naartuneq imaluunniit ernisimalluni sulingiffeqar-neq pissutigalugit soraarsitaasinnaangilatit. Taamaattumik sulisitsisoq soraarsitsiniaruni allamik pissutissavimmik pissuteqartariaqarpoq, soorlu suliaasaaleqinermik imaluunniit sipaarniarnermik.

- Naartuneq imaluunniit ernisimalluni/angajoqqaatut sulingiffeqar-neq pissutigalugit soraarsitaangitsutit sulisitsisup uppersarsinnaasussaavaa.

Apeqqu 18:

Aqutsisunit/suleqatinnit uumisaarneqartarpunga. Qanoq iliussaanga?

Sulisut sinniisaannut saaffiginnigit uumisaarisarnerlu oqaluttuaralugu. Suliffinni sulisut sinniisoqanngippata peqatigiiffimmut ikiortissarsiorsinnaavutit.

- Misissoruk suliffeqarfimmi suleqatigiinnermi ajornartorsiutit, qingasaarisar-neq imaluunniit uumisaarinerit pillugit allasimasunik maleruagassaqarner-soq.

Apeqqu 19:

Suliffinni suleqatigiinnermi ajornartorsiuteqarpoq. Qanoq iliussaanga?

Sulisut sinniisaat saaffigiuk ajornartorsiutaasunillu nassuiaallugu. Taava taassuma aqutsisut suleqatitillu ajornartorsiutaasunik oqaloqatigisinnaavai.

- Suliffimmi sulisut sinniisoqanngippata taava peqatigiiffimmut ikiortissarsiorit.

Apeqqu 20:

Suliffiga suliffikkuminanngilaq. Qanoq iliussaanga?

Isumannaallisaanermut sinniisoq saaffigiuk ajornartorsiutaasorlu pillugu oqaloqatigalugu – tamamani sullivimmi avatangiisit timikkut tarnikkulluunniit ittut pineqarpata.

- Suliffinni isumannaallisaanermut sinniisoqanngippat sulisut sinniisaannut saaffiginnigit. Isumannaallisaanermut sinniisoqanngippat sulisullu sinniisoqanngippata peqatigiiffimmut saaffiginnigit.

Apeqqu 21:

Suliffinni saassunneqarpunga. Kia ikiorsinnaavaanga?

Ingerlaannarlutit sulisut sinniisaat imaluunniit sulisitsisut saaffigiuk. Taakku pisussaapput taamaattoqartillugu ilinnik ikiuissallutik.

Apeqquut 22:

Suliffinnit soraarniarpunga. Qanoq iliussaanga?

Soraarniaruit tamanna allakkatigut nalunaarutigisariaqarpat. Taamaalillutit uppernarsaatissaqas-saatit soraarniuteqarsimaninnik ullorlu suna kingullermik sulisimaninnik.

- Maluginiaruk soraarniarluni sioqqutsisumik kalerriinissamut piffissarititaq suna isumaqati-giissummi ilinnut atuunnersoq (imaluunniit funktionærit (“atorfillit”) pillugit inatsimmi, tas-sani pineqartunut ilaaguit).
- Soraarniuteqanngikkaluarluni allamik periarfissaqarnersoq isumaliutigiuk. Assersuutigalugu suliffinni uumisaarneqartarnerit imaluunniit pimmatigineqartarnerit ajornartorsiutaappat, soraarniuteqarnissaq siulliunnagu sulisut sinniisaannik tamanna pillugu oqaloqatiginnin-nissaq tulluartsuunnaavoq.
- Soraarniutivit eqqortumik allannissaa pillugu siunnersortissarsiorsinnaavutit sulisut sinnii-saannut, peqatigiiffimmut imaluunniit SIK-p allattoqarfianut.

Apeqquut 23:

Atorfimmut tunngatillugu oqaloqatigiinnissamut aggeqqusaavunga. Tamanna uannut qanoq isu-maqarpa?

Atorfimmut tunngatillugu oqaloqatigiinneq (tjenstlig samtale) tassaasinnaavoq soraarsitaanissa-mut alloriarneq siulleq. Taamaattumik oqaloqatigiinnissamut taamaattumut aggeqqusaaneq imaannaanngitsutut isigisassaavoq.

- Atorfimmut tunngatillugu oqaloqatigiinnissamut aggeqqusaaguit ilisimatinneqartussaati-taavutit suna oqaluuseriniarneqarnersoq.
- Oqaloqatigiinnermi illersuisussamaatissannik ilaqarsinnaatitaavutit. Illersuisusaaq taanna tassaassaaq inuk tatigisat, soorlu ikinngutigilluakkat imaluunniit sulisut sinniisaat.
- Pisortani sulisitsisut pisussaataapput atorfirmut tunngatillugu oqaloqatigiinnermi eqqaa-massutissanik allattuinnissaminnut. Tassa Namminersorlutik Oqartussani imaluunniit kom-munimi suliguit sulisitsisoq allagaqassaaq oqaloqatigiinneq imaqaarniliorlugu. Isummavit imaqaarniliami eqqorlugit issuarneqarnissaat pisinnaatitaaffigaat. Tamanna immikkut pi-ngaaruteqarsinnaavoq sulisitsisup oqaloqatigiinnermi oqaatigisai isumaqatiginnikkukkit.
- Suliffimmi namminersortunit pigineqartumi sulisitsisoq pisussaataannngilaq oqaloqatigiin-neq allakkatigut imaqaarniliussallugu, taamaakkaluartorli oqaloqatigiinnermit imaqaarnilior-

toqarnissaa kissaatigisinnaavat.

- Atorfimmut tunngatillugu oqaloqatigiinnissamut aggeqqunekaruit kaammattuutiginarpoq tamanna pitinnagu sulisut sinniisaannik, peqatigiiffimmik imaluunniit SIK-p allattoqarfianik oqaloqateqarnissat, ikiorneqarniassagavit.

Apeqquut 24:

Mianersoqqussummik (advarsel) tunineqarpunga. Tamanna uannut qanoq isumaqarpa?

Sulisitsisut ilaasa suli oqariartaaseq “oqaasiinnakkut mianersoqqussuteqarneq” atortarpaat, kisianni mianersoqqussuteqarneq (advarsel) tamatigut allakkatigoortuusariaqarpoq. Taamaattariaqarpoq uppersaataissaqarnissaq ilaatigut pissutigalugu, sulisitsisoq sulisorlu tamarmik tunngavissaqarniassammata. Taamaattumik sulisitsisuit mianersoqqussuteqarfiginialerpatit tamanna allaganngorlugu piumassavat.

- Mianersoqqussuteqarnermut taarsiullugu sulisitsisuit *assuarliuteqarfigisinnaavaatit* (påtale). Taanna mianersoqqussuteqarnermit sallaannerusumik pineqaatissinneqarnertut isigineqartarpoq. Aammali sulisitsisoq *atorfimmut tunngatillugu oqaloqatigiinnissamut* (tjenstlig samtale) aggeqqusisinnaavoq. Tassani sulisitsisup ilisimatissavaatit suna naammaginnginnerlugu, tamatumalu qanoq iluarsineqarsinnaanera oqaloqatigiissutigissavarsi. Taamatut oqaloqatigiinneq iluatsillugu aamma sulisitsisoq mianersoqqussummik tunniussisinnasarpog imaluunniit soraarsinnialersarneqarnerit nalunaarutigalugu.
- Mianersoqqussuteqarneq kalerrisaarutaavoq sulisitsisup suliannik imaluunniit pissuserisannik naammaginnginneranik. Soorlu imaassinnaavoq arlaleriarlutit inortuillutit suliartoravit mianersoqqussummik tunineqartutit. Allakkami mianersoqqussummi allassimagajuppoq tamanna sulisup iluarsinngippagu soraarsitaanermik kinguneqarsinnaasoq.
- Ilaanni mianersoqqussummi allassimasoqartarpoq mianersoqqussut qanoq siviutigisumik atuutissasoq. Allakkami taamatut piffissaliisoqarsimangikkaangat mianersoqqussut ukiup affaanit ukiumut ataatsimut atuussinnaasarpog, apeqqutaasarluni mianersoqqussut pissut-sinik sunik tunngaveqarnerisog.
- SIK-mut ilaasortatut kattuffiup allattoqarfia saaffigisinnaavat nalilertillugu mianersoqqussummut tunngaviusog pissusissamisoortuunersog.

Apeqquut 25:

Allakkatigut tusarniaavigineqarpunga soraarsinneqalersaarnera imaluunniit peersinneqalersaarnera pillugu. Tamanna uannut qanoq isumaqarpa?

Namminersorlutik Oqartussani imaluunniit kommunimi sulisuuguit soraarsinneqartinnak – siogqutsisumik kalerriinikkut imaluunniit peersinneqarnikkut – tusarniaavigineqaaqqaartussaavutit (inatsimmi ima taaneqartoq: “peqataasup isumaanik tusarniaaneq”). Suliffimmi namminersortumi

imaluunniit pisortat piginneqataaffigisaanni (soorlu Nukissiorfinni, Air Greenland-imi imaluunniit Mittarfeqarfinni) sulisuugaanni taamatut tusarniaavigineqarnissaq piunasaqaataangilaq.

- Sulisitsisup tusarniaalluni allakkamini soraarsitsilersaarnerni tunngavigisani ilisimatitsisutigissavai periarfississallutillu soraarsitsiniarnerni oqaaseqarnissannut/akerliliinissannut. Sulisitsisoq oqaaseqaativit/akerliliinivit kingusinnerpaamik qaqugu tiguneqareersimannissaannik taasaqassaaq.
- Isumaqaruit soraarsitsilersaarneq/peersitsilersaarneq tunngaveqanngitsoq, pingaaruteqarpoq tusarniaanerni akissutissanni tamanna oqaatigissallugu.
- Maluginiassavat pisortat suliffeqarfiini sulisitsisusut soraarsitsilersaaleraangamik tusarniaajuaannanngimmata, naak tamatumani inatsisit malittussaagaluarlugit.
- Soraarsitsilersaarnerni/peersitsilersaarnerni tusarniaavigineqaruit SIK-mut ilaasortatut ingerlaannaq SIK-p allattoqarfianut saaffigininnissat kaammattuutigaarput. Kissaatigigukku SIK-p allattoqarfia sinnerlutit tusarniaanerni akissuteqarsinnaavoq.

Apeqquut 26:

Suliunnaarsitaavunga (fritstillet). Tamanna uannut qanoq isumaqarpa?

Suliunnaarsitsineq ima paasineqassaaq suliartortussaataajunnaartutit, kisianni akissarsiaqaannassasutit piffissap soraarnissannik siumut kallerriuteqarfiusup naanissaata tungaanut.

- Soraarsinneqaruit tamanna nalinginnaasumik pisussaavoq soraarsitaanissamik kallerriuteqarnikkut, piffissap kallerriuteqarfiusup qanoq siviutiginissannut apeqqutaassalluni qanoq siviutigisumik sulisimanerit. Piffissami kallerriuteqarfiusumi nalinginnaasumik sulisussaagaluarputit – kisianni tassa sulisitsisuit *suliunnaarsippaatit*.
- Suliunnaarsitaqqanerup nalaani allamik suliffittaaraanni ilaannikkut sulisitsisoq akissarsianik ilanngaassisinnaasarpoq, kisianni nalinginnaasumik aatsaat taamaattoqarsinnaanera suliunnaarsitsinermini nalunaarutigisimaguniuk. Ilnnut tunngatillugu sulisitsisup qaqugukkut taamatut akissarsianik ilanngaassisinnaanera pillugu SIK-p allattoqarfia oqaloqatigisinnaavat.
- Sulisitsisup ilaannikkut feeriarfissat inatsit innersuusutugalugu ullut feeriarfissat suliunnaarsitaanerup nalaani atornerqartutut naatsorsuutigisinnaasarpai. Suliunnaarsitaqqaninni feerissannik sulisitsisup atornerqartussaatsinera pillugu SIK-mut ilaasortatut SIK-p allattoqarfia siunersioqatigisinnaavat.

Apeqquut 27:

Suliartortariaqarunnaarsitsineq (fritagelse) aamma suliunnaarsitsineq (fritstilling) sukku assigiingissuteqarpat?

Oqariartaatsit imminnut assingusut “suliartortariaqarunnaarsitsineq” (fritagelse) aamma “suliunnaarsitsineq” (fritstilling) sulisitsisunit kukkusumik atorneqartaannarput, tamannalu sulisumut paatsiveerunnarsinnaasarpoq.

Sulisitsisoq soraarsitsinermini aalajangersinnaavoq tamanna *suliunnaarsitsinerussasoq* imaluunniit *suliartortariaqarunnaarsitsinerussasoq* piffissap soraarnissamik siumut kallerriuteqarfiusup nalaani (soraarnissap tungaanut piffissap taassuma sivilisussisissaanut apeqqutaassalluni sulisup qanoq si-visutigisumik atorfeqarsimanera). Oqaaseq latiinerisuumik naggiulik “suspendere” ilaanni qallunaatut atorneqartarpoq suliartortariaqarunnaarsitsinermut tunngatillugu.

Suliunnaarsitsinermi sulisoq piffissap soraarnissamut kallerriuteqarfiusup nalaani sulisussaataas-sanngilaq, kisianni piffissap naanissaata tungaanut akissarsiaqassalluni. Sulisorli *suliartortariaqarunnaarsinneqaruni* piffissami pineqartumi sulisitsisumi suliartoqqussagalarpani aatsaat suliartussaaq, pisariaqartinneqarami.

Taamaattumik soraarsitsinermi pingasunik periarfissaqarpoq soraarsitsinerup piffissami soraarnissamut kallerriuteqarfiusumi qanoq ingerlanneqarnissaanut: a) Sulisoq soraarnissami tungaanut piffissaq naallugu sulinnassaaq, b) Sulisoq suliartortariaqarunnaarsitaassaaq, kisianni piffissap pineqartup ingerlanerani suliartoqqusaariataarsinnaassalluni, tamanna pisariaqartinneqarpat, imaluunniit c) Sulisoq suliunnaarsitaassaaq, taamaattumillu piffissami pineqartumi suliartortussaati-taassanani.

Suliartortariaqarunnaarsitsineq aamma allamut tunngatillugu atorneqartarpoq, tassa sulisitsisoq misissuinnissaminut piffissamik pisariaqartitsigaangat. Misissuinerummi nalaani sulisup suliffimmi-niinnginnissaa sulisitsisup tulluarnertissinnaavaa.

Assersuutigalugu: Sulisoq suliffimmini nakuusersimasutut unnerluutigineqarpoq.

Sulisitsisup tamatuminnga misissuinerani, soorlu takunnissimasunik oqaloqatiginnittarnerani, unnerluutiginninnerullu eqqortuuneranik naliliiniarnerani, sulisoq *suliartortariaqarunnaarsitaasinnaavoq*. Misissuineq naammassippat pissutsit qanoq innerat apeqqutaatillugu sulisitsisup sulisoq suliartoqqeqqusinnaavaa, unnerluutiginninneq tunngavissaqarsimangippat imaluunniit ingasat-tumik soraarsitaassutissamik pisoqarsimangippat – imaluunniit soraarsitsiniarneq aallartissin-naavaa, tamanna pisariaqartutut nalilerneqarpat.

Apeqquut 28:

Soraarsitaavunga. Qanoq iliorsinnaavunga?

Soraarsitsineq allakkatigut pisariaqarpoq. Oqaasiinnakkut soraarsitaaguit tamanna allaganngor-lugu piunmassavat. Aammami isumaqatigiissutini amerlanerni allassimavoq soraarsitsineq allak-katigoortumik pissasoq.

- Allagaq soraarsitsissut atsiussanngilat allakkami allassimasunik nalornissuteqaruit, soraarsi-tsinerlu ilinnut qanoq kinguneqassanersoq paasilluannikkukku. Aamma atsioqinagu so-

raarsitsinermut pissutaasoq isumaqatiginngikkukku.

- SIK-mut ilaasortatut SIK-p allattoqarfia attaveqarfigiuk, taamaalillutit nalilertissinnaaniassagaku soraarsitsineq pissusissamisoornersoq. Ilaatigut naliligassaavoq soraarsitsineq pissutissaqarnersoq tun-ngavilersorluagaanersorlu, eqqortumillu pinersoq soraarsitaanisamik kalerriuteqarneq immaqalu *suliunnaarsitaaneq il.il.* (aamma taanna takuuk) eqqarsaatigalugit.
- Ikorsiissutininik pisartagaqassaguit kommunimi suliffeqanngitsutut nalunaartariaqarputit suliffeerunnermilu ikorsiissutininik imaluunniit pisortanit ikorsiissutininik qinnuteqarlutit.

Apeqqu 29:

Suliffinnit *peersitaavunga* (bortvisning). Tamanna uannut qanoq isumaqarpa?

Sulisitsisoq nalinginnaasumik soraarsitsiniaruni sulisumut kalerriuteqaqqaartussaavoq. Sulisulli atorfeqarnini ingasattumik paarinerluppagu sulisitsisuata *peersissinnaavaa* – tassa ullormit ullormut atuutilersumik soraarsillugu; imaappoq sioqqutsisumik kalerriuteqaqqaarnani. Peersitsineq ullormit peersitsiviusumit akissarsiaqarunnaarnermik kinguneqartarpoq.

- Peersitsineq allakkatigut nalunaarutigineqartariaqarpoq. Peersitsineq oqaasiinnakkut nalunaarutigineqarpat tamanna allaganngorlugu piumassavat.
- Allagaq peersitsissut atsiussanngilat allakkami tassani allassimasunik nalornissuteqaruit, peersitsinerlu ilinnut qanoq kinguneqassanersoq paasilluanngikkukku. Aamma atsioqinagu peersitsinermut pissutaasoq isumaqatiginngikkukku.
- SIK-mut ilaasortatut SIK-p allattoqarfia attaveqarfigiuk, taamaalillutit nalilertissinnaaniassagaku peersitsineq pissusissamisoornersoq. Ilaatigut naliligassaavoq peersitsineq pissutissaqarnersoq tunngavilersorluagaanersorlu.

Apeqqu 30:

Atorfimmu atillugu ineqarnera qanoq pissava, maanna soraartussanngorama?

Atorfimmu atillugu ineqartinneqaraanni nalinginnaasumik imaappoq soraarsinneqaraanni imaluunniit nammineq soraaraanni taanna inigiinnarneqarsinnaanngitsaq.

- Sulisitsisoq sulisorlu allamik isumaqatigiissuteqarsimanngikkaangata malittarisassat inissianik attartortitsisarneq pillugu peqqussummi allassimasut malinneqartussaapput. Peqqussummi § 65-imi allassimavoq atorfeqarnerup unitsinneqarnerani sulisoq pisussaasoq inissiamik taamaatitsinissani allakkatigut nalunaarutigissallugu. Aamma allassimavoq sulisunut inissiaq attartugaq kingusinnerpaamik qimareersimaneqassasoq nalinginnaasumik taamaatitsinissamut nalunaarfissatut piffissarititaasup naannginnerani.

- Attartortitsisarneq pillugu peqqussummi aalajangersagaq tamanna ilisimassallugu pingaaruteqarpoq, tassa sulisup soraalernermini atorfirmut atatillugu inigisami taamaatinnaanik nalunaaruteqanngitsoorneranik arlalinnik assersuutissaqarmat. Aammami taamani sulisoq atorfinimmat inissaanik sulisitsisup pissarsissussimavaa.
- Kisianni soorlu juunip 30-ani soraartussaagaanni inigisamik taamaatitsinissaq kingusinnerpaamik maajip 31-ani nalunaarutigisassaavoq. Inigisaq taamaatinniarlugu aatsaat juunip 30-ani nalunaaraanni ineqarnermut akiliutit il.il. juulip 31-ata tungaanut nammineq akilertariaqalissapput, qaammammili tassani inissiami pineqartumi ineqarsinnaatitaanani.
- Juulimi nutaamik attartortussarsisoqarsimappat (taamaattariaqarporlumi), tassani qaammammut akiliutitigut isertitaalersussat pissutigalugit attartortuusimasutut akiligassaarutussaavutit.
- Nalorniguit sulisitsisoq aperiuk. Tamanna angusaqarfiumngippat SIK-p allattoqarfianut saaffiginnissinnaavutit.

Apeqqut 31:

Isumaqatigiissutit pillugit isumaqatigiinniarnert sivit sorput. Uanga qanoq inissisimavunga?

Isumaqatigiissutit pisoqqat atuutissapput isumaqatigiissutit nutaap isumaqatigiissutigineqarnissaata atsiorneqarnissaatalu tungaanut. Tassa isumaqatigiissutit pillugit isumaqatigiinniarnert sivit sorlualartut, pisinnaatitaaffitit taakkuusut suli piginnassavatit.

Apeqqut 32:

Qaqugu *suliumajunnaarsinnaavugut?*

Namminersorlutik Oqartussanik aamma suliffiutillit namminersortut kattuffiannik Grønlands Erhverv-imik (GE) tunngaviusumik isumaqatigiissutini *sulinermik unitsitsineq*-mik ataatsimut taaneqarput assigiinngitsut uku:

- *Strejke* = *Suliumajunnaarneq*,
- *Lockout* = *Sulisitsisup suliffimmik matusinera*,
- *Blokade* = *Suliartoraluanik isernaveersaartitsineq*, aamma
- *Boykot* = *Sulisartut suliarorumajunnaarnerat sulisitsisulluunniit suliartoqqusiunnaarnera*.

Tunngaviusumik isumaqatigiissutit taakku malillugit illit suleqatitillu sulinermik unitsitsisinnaati-taangilasi (*suliumajunnaarsinnaangilasi*) sulisut akissarsiaat sulinerminnilu atugarisaat pillugit isumaqatigiissut atuuttoq atuukkallartillugu (tamanna “aaqqiagiinnginnaveersaarnermik” taaneqarpoq) – aatsaalli taamaalorsinnaavusi “suliffiup akiliisinnaajunnaarnera, inuunerup eriagisariaqarnera, atugarissaarnissaq ataqqinassuserluunniit patsisigalugit sulinerup unitsinneqarnissaa

pisariaqalivissimappat.” Tassa imaappoq pissutsini immikkorluinnaq ittuni aatsaat sulinermik unitsitsisoqarsinnaavoq.

- Taamaattumik suliffimmi ajornartorsiuteqarpat tamakku iluarsiniarneqassapput sulisitsisup oqaloqatigineratigut, immaqa SIK akuutillugu – sulinermik unitsitsinernik kinguneqartussaanaatik.
- Aatsaat sulinermik unitsitsisoqarsinnaavoq *isumaqatigiissutit pillugit isumaqatigiinniarnernut* atatillugu. Tassani *suliumajunnaarneq* angusaqarniarluni ilungersuuteqarnermi sakkutut atorineqarsinnaavoq.
- Namminersorlutik Oqartussanik aamma GE-mi tunngaviusumik isumaqatigiissutini erseqqinnerusumik allaaserineqarpoq sulinermik unitsitsineq qanoq pisinnaasoq *suliumajunnaarneruppat* (strejke) imaluunniit *sulisitsisup suliffimmik matusinerippagu* (lockout). Soorlu malittarisassaqaartinneqarpoq sulinermik unitsitsinissap allakkatigut nalunaarutigineqaqqaartarnissaanik qanorlu isumaqatigiissitsiniartoqartarnissaanik.

Apeqquut 33:

Suliffiga *akilersuiunnaarpoq* (betalingsstandsning). Tamanna uannut qanoq isumaqarpa?

Suliffiit akiligassanik akilersuiunnaarpat taava ingerlaannartumik peqatigiiffimmut imaluunniit SIK-p allattoqarfianut saaffiginnigit.

- Betalingsstandsning-imik qallunaatut taaneqartartoq tassa suliffiup akiligassanik akilersuiunnaarnera – soorlumi oqaatsimi tamanna ersersinneqareersoq. Tamatuma sulisitsisoq unillatsiarnissaanut periarfissittarppaa, unillatsiarnerlu tamanna suliffeqarfiup siunissami ungasippallaanngitsumi imminut akilersinnaasumik ingerlaqqissinnaanerani nalilersuinermut atorineqassaaq, suliffeqarfik tunineqassanersoq imaluunniit akiliisinnaajunnaarluni unissanersoq (konkurs).
- Akilersuiunnaarnermi illit soraarsinneqarnalluunniit atorfinitsitaanermut isumaqatigiissutit atorunnaarsinneqassanngilaq, kisianni piumasaaqatigisinnaavat piffissami pineqartumi akissarsiassavit qulakkeerneqarnissaat. Tamanna pisinnaavoq aningaaserivimmit qularnaveeqqusiinikkut imaluunniit inatsisilerituup nakkutilliisuutitap uppersaanaeratigut. Qularnaveeqqusiineq pissaaq akiligassanik akilersuiunnaarnerup aallartinneranit ullut 14-it ingerlanerini. Taamaattoqanngippat illit atorfeqartitaanerpit taamaatinnessaa toqqarsinnaavat.
- Immaqa akiligassanik akilersuiunnaarnerup nalaani nalunaarfigineqassaait soraarsitaalersutit. Taamaattoqarpat tamanna ingerlanneqassaaq nalinginnaasumik soraarsitsinissamut siumoortumik ilisimatitsissuteqartussaaneq malillugu. Suliffeqarfik ingerlaannarpat kiisalu soraarsitaanerit atorunnaarsinneqarpat, taava illit atorfeqartitaanerit allanngornani ingerlaannassaaq atugassarititaasut aamma ukiut suliffigisimasavit amerlassusiat nikisinnernatik.

Apeqquut 34:

Suliffiga akiliisinnaajunnaarpoq (konkurs). Qanoq iliussaanga?

Suliffiit akiliisinnaajunnaarpat peqatigiiffik imaluunniit SIK-p allattoqarfia saaffigiuk.

- Akiliisinnaajunnaarnerup atuutilernerani akissarsiassannik pisassaqaareeruit Lønmodtagernes Garantifond-imut (sulineramik inuussutissarsiuteqartut sillimmatissaannik aningaasaateqarfimmut) qinnuteqaammik immersuininni SIK-mit ikiorneqarsinnaavutit. Suliffiup akiliisinnaajunnaarnera pissutigalugu akissarsiassat imaluunniit feriepengesiassat amigaatigilikatit aningaasaateqarfimmit pisinnaavatit.
- Malugiuk piffissaq killeqarmat suliffiup akiliisinnaajunnaarnerata kingorna kingusinnerpaa-mik qaqugu Lønmodtagernes Garantifond-imut ikiorserneqarnissamik qinnuteqarnissamut. SIK-p allattoqarfianit tamanna pillugu siunnersorneqarsinnaavutit.

Taaguutit atorineqartut

Atorfeqarnermut, soraarsitsinernut il.il. tunngatillugu taaguutit saqqummersitami uani atorineqartut nassuiarneqartullu, ulluinnarnilu akuleriissillugit kalaallisut qallunaatullu atorineqarajuttut (ilaannikkut kalaallisut aalajangersimasumik taaguutiviunatik oqaatsit arlal-lit atorlugit nassuiaataanusunik):

- **Tunngaviusumik isumaqatigiissut** = Hovedaftale
- **Isumaqatigiissut** = Overenskomst
- **Tapiliusaaq** = Protokollat
- **Soraarsitsineq** = Afskedigelse, opsigelse
- **Peersitsineq** = Bortvisning
- **Suliunnaarsitsineq** = Fritstilling
- **Suliartortariaqarunnaarsitsineq** = Fritagelse
- **Tusarniaaneq** = Partshøring
- **Soraarsitsilersaaneq** = Påtænkt afskedigelse
- **Peersitsilersaaneq** = Påtænkt bortvisning
- **Mianersoqqussut** = Advarsel
- **Assuarliuteqarneq** = Påtale
- **Atorfimmut tunngatillugu oqaloqatigiinneq** = Tjenstlig samtale
- **Nakorsamit uppernarsaat** = Lægeerklæring
- **Sulisimanermik uppernarsaat** = Tjenesteattest
- **[Allagaq] ilassinneqqusissut** = anbefaling[sbrev]
- **Atorfinitsitaanermut isumaqatigiissut** = Ansættelseskontrakt
- **Sulineramik unitsitsineq** = Arbejdsstandsning - ataatsimut ukununnga taaguutigineqartoq:
 - **Suliumajunnaarneq** = Strejke
 - **Sulisitsisup suliffimmik matusinera** = Lockout
 - **Suliartoraluanik isernaveersaartitsineq** = Blokade
 - **Sulisartut suliarorumajunnaarnerat sulisitsisulluunniit suliartoqqusiunnaarnera** = Boykot

- **Akilersuiunnaarneq** = Betalingsstandsning
- **Akiliisinnaajunnaarneq** = Konkurs

Taaguutinik allattuinermi najoqqutat:

Isumaqatigiissutit, inatsisit, qallunaatut/kalaallisut ordbogi aamma SIK-p pikkorissaanermut atortui.